

PAS: RUU Perhimpunan Aman taktik BN hadapi PRU, Najib patut batal
The Malaysian Insider
29 November , 2011

KUALA LUMPUR, 29 Nov — PAS menegaskan Rang Undang-undang Perhimpunan Aman 2011, yang hendak dibahasakan dengan beberapa pindaan pagi ini, mesti ditarik balik kerana mempunyai kecacatan melampau dan taktik pentadbiran Najib menghadapi pilihan raya umum ke-13.

Ketua Penerangannya Datuk Tuan Ibrahim Tuan Man berkata, PAS mahu mengingatkan kerajaan Umno-BN bahawa transformasi yang dibawa oleh Perdana Menteri Datuk Seri Najib Razak mestilah ke arah lebih baik, bukan undur ke belakang.

“Jangan sesekali cuba memperkenalkan transformasi palsu yang berlindung di sebalik akta atau rang undang-undang bagi menghalalkan tindakan zalim pemerintah,” kata beliau dalam kenyataan.

Rang undang-undang itu bagi menggantikan Seksyen 27 Akta Polis dijadual untuk dibahasakan di Dewan Rakyat pagi ini.

Ekoran kritikan dan kecaman banyak pihak, Kabinet Najib memutuskan untuk membawa tujuh pindaan ketika ia dibahasakan di peringkat jawatankuasa.

Tuan Ibrahim (gambar) berkata, rakyat melihat rang undang-undang ini “adalah gambaran kecelaruan dan kebimbangan parti Umno-BN yang kini berhadapan dengan kebangkitan rakyat.”

“Apakah Umno tidak belajar daripada pelbagai akta zalim yang dilaksanakan di Timur Tengah sehingga menyebabkan kemarahan rakyat? Bahkan, mereka bangkit bukan sahaja mendesak undang-undang dipinda tetapi menumbang terus kerajaan yang zalim itu,” kata beliau lagi.

Tambah beliau, rang undang-undang baru ini merupakan kebimbangan pemerintah terhadap keputusan yang akan dibuat oleh rakyat dalam pilihan raya umum ke-13 bagi membolehkan kerajaan bertindak menangkap dan menghukum sesiapa sahaja yang berhimpun menunjuk perasaan tidak puashati terhadap tindakan kerajaan.

Katanya, rakyat umum perlu disedarkan tentang implikasi Rang Undang-undang Perhimpunan Aman ini kerana seandainya ia diluluskan, maka rakyat sudah pasti hampir tidak boleh langsung berhimpun bagi meluahkan bantahan terhadap sebarang isu-isu yang tidak berpihak pada kerajaan Umno-BN walaupun ia jelas menindas mereka.

“Ingatlah, kemarahan rakyat tidak akan dapat disekat dengan undang-undang. Ambillah pengajaran daripada sepucuk surat yang dihantar oleh Saidina Umar bin Abdul Aziz tatkala beliau menerima permohonan peruntukan kewangan bagi membuat benteng untuk menyekat sekumpulan golongan pemberontak

“Kata Umar bin Abdul Aziz ‘bentenglah kemarahan rakyat kamu dengan keadilanmu, payungi rakyatmu dengan kasih sayangmu, kerana itu lebih baik dari kamu membina benteng besi menyekat kemarahan rakyatmu’,” katanya lagi.

The Malaysian Insider

Hakcipta © 2011 The Malaysian Insider

Source: <http://www.themalaysianinsider.com/bahasa/article/pas-ruu-perhimpunan-aman-ta-ktik-bn-hadapi-pru-najib-patut-batal/>